

2 Timoti

Paulo Malele Muniai Epapua Timoti Eegai Eulaisa Auga

1 ¹Lau Paulo. Ufainagai Deo epako'ania eifa kaisau Iesu Kristo agepako'ania auga agu pagai maunina agepenia eoma. Ega kainai Deo ifo ega logoai lau ekinaniau apostolo, ke Iesu Kristo fouga iifafouga au epamiaisau.

²Pau i'ina malelega lapapua laulaisa Timoti oi eemu efai pugu. Iifa faunina Iesu fouga maamuai laifania efua auga lopako'ania kainai, oi auga lau gau ko'a koa i'opomu lomia. Lau alou ko'agai ke guau fofougai oi faumuai i'a Ama'a Deo ke a'a Lopia Iesu Kristo fou lamegamega peni'i. Ega koa Isa oi guamu fekeania, e'i gafegafe akaiki'a ke e'i gagao fou fekepenio foagu felo laoma.

Paulo Timoti Magogo Kapula Epeniia

³Lau aufa kina gapi gani papiau fau'iai Deo lagoi kapula penia aisama, oi laopolanio faumuai lamegamega aefuafua. Ke oi alomu ko'agai Iesu Kristo lopako'ania kainai Deo tenkiu lapenia. Ke Deo lau ufu apau keau afagaina auga, lau isafa alou ko'agai Isa maagai laomai felo mo laopolaga ke laau afagaina. ⁴Ega'ina alogai lau oi lapua'afunio aisama, alomu ekiekie maamu iuga eake auga laopolaga. Ega puo anina laani oi faisao pugu, ega koa Deo alou fepagama alogaina laoma. ⁵Lau lalogo oi ufumu Lois ke inamu Eunise fou alo'i ko'agai Iesu kepako'a kakaua. Isa Iesu kepako'ania koa i'opoga mo, lau lapako'ania oi isafa ega'ina pako'aga eemuai ekae, alomu ko'agai Iesu Kristo lopako'ania. Lau oi laopolanio aisama, ega'ina pako'aga laopolaga. ⁶Ega kainai lau imau oi kaniamuai laogeaua ke lamegamega aisama, Deo ega pipeni loafia eemuai ekaega auga lapaopolanio fopapinauga felo laoma. Ke pau ameku lo epuaufa koa i'opoga, lo koa lapuaufaiso fopinauga felo. ⁷Gome Deo ega pipeni Spirituga epenii'a auga, pinauga e'inoka puogai pinauga famani'iaina

aeoma. Kai Deo ega Spiritu isapugai alo'a ko'agai papiau ani'i faani, ifo'a fa'ima feloi'a, ke Isa maagai kapa felo'i mo fakapa'i eoma.

⁸Ega puo i'a a'a Lopia Iesu fouga ko'a ipauma papiau maa'iai loifafoua auga meagaina folopa'aua. Ke lau kelele aga'o alakapaisa kai Lopia Iesu puogai latipula auga isafa meagaina folopa'aua. Kai lau iifa faunina Iesu fouga kainai lakiekie koa i'opoga, oi isafa Iesu puogai fou fakiekie aga'omo. Ke Deo ega Spiritu isapugai Iesu fouga iifafouga foloapakipo. ⁹Deo i'a kania'a eagamauga ke eifani'a ega koa aague alogai, Isa maagai alo opai agugai faagu eoma. Deo i'a fau'aisai iina ekapa oma auga, i'a kapa felo'i akapai'i puogai laa'i. Kai Isa agofa'a aepagama koa kai ifo ega logoai ke ega gafegafeai muni kaisau Iesu Kristo agepako'ania auga kania ageagamauga eoma kainai, fau'aisai ega koa ekapaisa. ¹⁰Ke pau Deo, Iesu Kristo i'a kania'a isagamauga auga eulaisa emai i'ina agofa'agai aisama, iifa faunina Iesu fouga alogai, ega'ina gafegafe epakinal'i, umina alogai aagu au'a alo'a epaeaea. Ke Iesu Kristo emae emaunimue puogai, i'a falogo agamae aisama, amu ma'oai egae afakefua. Kai iifa faunina Iesu fouga apako'ania au'a isa koa i'opoga agamaunimue, agu pagai maunina agepeni'a fou isa afugai agaagu aoniamo. ¹¹Deo lau falao iifa faunina Iesu fouga, faifafoua eoma kainai ekinaniam inogo au, apostolo, ke pamalele au epamiasau. ¹²Lau iifa faunina Iesu fouga lainogonia kai, papiau anina akeani. Ega kainai lau lakiekie ke tipula au lamia. Kai lau Deo lalogo felo alogaina auga lapako'ania. Ke Isa iifa faunina Iesu fouga lau imauai eogeaua fakapa eoma auga afaegea agelao muni Deo papiau aga'o aga'o e'i laomai felo o apala auga afa agepeni'i auga alou ko'agai lapako'ania. Ega puo lau Isa faugai lakiekie auga meagaina alapa'aua.

¹³Oi maamuai Deo ega iifa ko'a'i laifani'i fokapa'i laoma au'i kai'i ai foapea. Ke papiau alopamaleleni'i alogai, alomu ko'agai Iesu Kristo fopako'ania, anina foani, ke papiau isafa ani'i foani. ¹⁴Ke Deo ega Spiritu i'a alo'aisai eague auga ega isapuai lau Deo ega iifa ko'a ipauma oi imamuai laogeaua auga fo'ima felo ke fopinauga felo.

Meagai Auga Ke Aemeagai Auga

¹⁵Pako'a papiau'i ma'o Asia agogai keumakalainiau, kepua'afuniau auga fouga lologo. Ega'ina papiau'i epo'iai Fikelus ke Hemokenes auni'i isafa lau kepua'afuniau. ¹⁶Lau Onesiforus faugai Lopia Deo lamegamega penia ega koa Deo isa ke ega famili fou gua'i feania laoma. Gome isa kina isa'i ai emai eeuai eagu magogo kapula epeniaiu epakulaniau. Ke lau tipula au lamia tieniai kepaagaisau mo ganinagai eisau aemeagai. ¹⁷Kai isa emai Roma taoninai aisama, ekapuniau elaolao ekapulaisau kai eapakipo. ¹⁸Lau lamegamega ega koa muni kina fua'i ai Lopia papiau e'i laomai felo o apala afa agepeni'i aisama, isa Lopia ega guani feafia laoma, ke ega laomai felo kainai afa isafa felo fepenia laoma. Ke Efesus taoninai isa lau keaga i'oi'i i'oi'i ai ala epalagai omaisau auga isafa lologo.

Ifani Au'i Koa Fomia Fokapula Iesu Faugai Fopinauga

2 ¹Ega puo Timoti gauagai, oi aufa kina Iesu Kristo fou oagu aisama, ega gafegafe epakinaliso epalagainio. Ke isa ega gafegafeai, aufa kina alogai fokapula faefuafua. ²Ke lau papiau ma'o ago'iai laapa iifa faunina Iesu fouga laifafoua aisama, oi isafa egal'ina iifa'i a'o'i logonia. Ega kainai oi papiau kapa'i alo'i ko'agai Iesu kepako'anua au'i, ega'ina iifa'i isa ima'iai foogeaua. Ke ega'ina au'i isafa, papiau i'oi'i fekepamaleleni'i fekaina. ³Ke oi auga Iesu Kristo ega ifani auga felo fomia, lau fou isa faugai fapinauga. Ke agapinauga alogai isa puogai agakiekie mo ganinagai, kiekie gamuga mo faopo faafiapia mo. ⁴Ifani au'i isa e'ima'i lopiaga alo kegapagama keoma puo, eifani'i aisama kekaigugu kecipaini. Ke kai aga'o afe pinauga'iai aeofa isa ifo ega pinauga ke e'ima lopiaga ega pinauga isafa aepalifua. Ega koa i'opoga, oi isafa Iesu Kristo eifa kapula penio kapa'ina fokapa eoma auga mo fokapa. ⁵Ke ifani auga koa i'opoga, oi pipalau opuaga alogai piau auga aga'o koa i'opomu. Ega puo piau auga kapa felo aga'o gaafia eoma puo, opua laoga maina kai'iai mo epakai'i koa i'opoga, oi Iesu Kristo kapa'ina maamuai eifania auga mo, alokapa aisama, muni afa felo aloafia. ⁶Ke oi auga fo'ama ifauga auga aga'o koa i'opomu. Ke fo'ama ifauga auga kapa epinauga kapula auga, ega fo'ama ageani kakaua. Kai isa'i akepinauga kapula au'i, muniai kai e'i fo'ama akeania. Ega koa i'opoga, oi Iesu Kristo faugai alopinauga kapula alogaina aisama, muni afa felo aloafia. ⁷Ke iifa gome Lopia Deo oi kapa ma'oai mologo looma auga agepalagainio alologo. Ega puo kapa'ina maamuai laifa kakau'i au'i foopolala felo alogaini'i.

⁸ Oi aufa kina alomuai Iesu Kristo foopolaga. Deo epako'anua eifa koa i'opoga mo, isa papiau aumauni ipauma emia, Davide okogai eake emai i'ina agofa'agai. Ke emae kai maeai emaunimue. Lau iifa faunina Iesu fouga i'ina auga mo papiau maa'iai laifafoua. ⁹Kai papiau isa'i iifa faunina Iesu fouga keumakalaina. Ega kainai isa lau kelele akaiki'a'i kekapa'i au'i koa i'opou kepamaisau, tieiniai kepaagaisau ke tipula au lamia lakiekie alogaina. Kai lau tipulai kepaaguisau mo ganinagai, papiau i'oi'i isa'i Deo ega iifa papiau maa'iai keifania aefuafua. Ega puo lau tieiniai kepaagaisau mo ganinagai, Deo ega iifa auga tieiniai akepaaga afaekaina. ¹⁰Kai Deo anina eani Isa ega iifa auga feka felao, fuagai Isa ifo ega logoai papiau ekinani'i au'i Iesu Kristo fekepako'anua, ega koa kania'i feagamauga eoma. Egae kai isa lau fou Lopia Deo ifo ega agofa'ai faagu aoniamo eoma. Ega kainai Deo ekinani'i au'i fau'iai tieiniai kepaagaisau mo ganinagai, gamuga mo laoponia laafiapia mo. ¹¹Lau i'ina iifaga ko'a ipauma auga alaifania:

Iesu Kristo i'a a'laomai apala'i fau'iai emae.

Ke isa i'a fau'aisai emae auga agapako'anua koa aisama,

i'a ufainagai laomai apala'i akapai'i puogai kepamaei'a koa
 i'opoga au'i
 agapua'afuni'i afalakapa'i pugu.

¹² Ke i'a Iesu puogai agakiekie ganinagai, gamuga mo agaopo
 agaafiapi'i mo koa aisama,
 muni i'a isa fou agofa'a fofouga aoniamo aga'ima.
 Ke i'a papiau maa'iai isa agapuniaiaina koa aisama,
 muni isa isafa i'a agepuniaiaini'a.

¹³ Ke Isa ega iifa auga ko'a'i mo, ifo agepuniaiaini'i afaekaina.
 Ega kainai i'a Iesu Kristo afalapako'ania mo ganinagai
 Isa kapa'ina agepeni'a eoma auga agepeni'a paisa.

Deo Maagai Pinauga Felo Ikapa Auga

¹⁴ Oi pamalele au'i kapa'i mo lopamaleleni'i au'i, kapa'ina maamuai laifa kakau'i au'i isa maa'iai foifania, fopaopolani'i. Ke pamalele au'i, papiau isa'i fou akeakekuia aisama, kapa felo aga'o afaemia. Kai isa e'i akekuai papiau Iesu Kristo kepako'ania au'i e'i pako'a akepalifu afe'aina. Ega kainai oi isa foifa kapula peni'i, Deo agogai nini'ani mo puogai papiau fou fakeakekuia aage mo. ¹⁵ Ke oi Deo ega pinauga lokapa alogai, imaaumu fofouga Deo fopalao penia, ega koa Deo ke papiau ma'oai ago'iai iifa gome oi Deo ega pinauga ikapa aumu fekeoma. Ega'ina auga oi Deo ega iifa ko'a'i mo fopapinaugani'i papiau kai'iai fekepea. Ke laomai felo'i mo fokapa'i, ega koa kapa aga'o meagaina folopa'aua. ¹⁶ Oi papiau kapa'i Deo ega iifa eegai keifa apala, ke keakekuia aage mo au'i fo'eg'e'i, ke ee'i isafa fololao. Gome pifoge pamalelega au'i Deo ega iifa akeumakalaina, eegai akeifa apala aage mo afakefuafua agelao Deo ega iifa akeumakalai ipaumania mo. ¹⁷ Isa e'i pamalele auga, kua akaiki'a ife'aisai eaguau faaga'a epalifua koa i'opoga. Isa epo'iai Hemenius ke Filetus auni'i isafa Deo ega iifa ko'a'i au'i kepua'afuni'i iina koa kekapa. ¹⁸ Isa auni'i iifa pifoge'i keifani'i keifa, Deo mae au'i epamaunimue'i efua keoma. Ega keifa oma kainai, pako'a papiau'li isa'i kepali'u'i, kapa'ina kepako'a kakaua auga kainai akepea. Ke iifa faunina Iesu fouga keumakalaina, ke ke'ualai keaga i'oinagai kepea. ¹⁹ Kai pifoge pamalelega au'i ega koa kekapa mo ganinagai, Deo iina eifa oma, 'Lopia papiau kapa'i, Isa ega papiau ko'a'i au'i elogo.' Ke Deo iina eifa oma pugu, 'Kaisau Lopia Iesu Kristo epako'ania, ega laomai apala'i ageumakalaini'i eoma, papiau maa'iai eifafoua auga, laomai apala'i ma'oai feumakalai afe'aini'i.' Deo ega iifa i'ina auga, uu'u kapula ipauma eapa aelao aemai auga koa i'opoga. Ega puo Deo ega iifa auga iifa gome ko'a ipauma paisa.

²⁰ Lau kapa aga'o maamuai alaafi'opo. Lopia ega e'a akaiki'a alogai gakugaku amu'i ma'o kekae. Gakugaku amu'i ega'ina au'i isa'i gold ke silifai kekapai'i. Ke isa'i auga auai ke kaki'aai fou kekapai'i. Papiau

gakugaku amu'i gold, ke silifai fou kekapai'i au'i, miamia kina'iai mo kekapinaugani'i. Kai gakugaku amu'i, auai ke kaki'aai fou kekapai'i au'i kina aage'iai kekapinaugani'i. ²¹Ega koa i'opoga, kaisau pifoge pamalele'i au'i e'i laomai apala'i ipauma'i ma'oai ageumakalaini'i, ke ifo laomai felo'i mo agekapa'i aisama, isa auga amu gold ke silifai kekapai'i auga koa agemia. Ke isa miamia akaiki'a'i kina'iai mo akepinauga. Ke isa ega pinauga felo ipauma kainai, Deo isa agepfua ageagu, Isa koa i'opoga alo opai auga agepamia. Ke Deo isa agepalagaina pinauga kapa felo Isa faugai gakapa eoma auga mo agekapa.

²²Ke Timoti, oi papiau agu'a'i laomai apala'i kemaaga an'i'i keani au'i lao'i mai'i ee'iai fopiaukoko. Kai oi papiau isa'i alo'i lolofagai Iesu Lopia kepako'ania, ke keifaga au'i fou Deo maagai laomai felo'i mo fokapulai'i fokapa'i. Ke ega'ina au'i fou Iesu fopako'ania, ke alomu ko'agai isa an'i'i foani fou gagaoai foagu. ²³Ke oi fologo papiau isa'i kenini'ani aage mo, kafo'o nini'ani'i keifani'i. Isa kapa'ina keifania auga isafa oko akelogo felo kai papiau maa'iai keifa fa'i'i aage mo. Ega koa kekapa akekua aage'i mo kepa'uegeni'i. Ega kainai oi ega'ina lao'i mai'i apala'i founakalaini'i an'i'i foloani. ²⁴Lopia ega pinauga auga akekua faepa'uegenia. Kai isa papiau ma'oai fegafe'i, ke fepamalele fekaina. Ke papiau isa akeifa apala penia mo ganinagai, gamuga mo feopo feafiapia mo. ²⁵Isa papiau kapa'i Deo ega iifa kekaisapua au'i, Deo ega gafegafe agepeni'i auga afia'amaga fekeafia'ama fougha gafegafeai fepamaleleni'i. Ega'ina alogai Deo ega iifa ko'a ipauma auga mino'i sepaeaea sepalogoni'i, e'i laomai apala'i fekeumakalaini'i, muni fakekapa pugu auga feifafoua laoma. ²⁶Ke fuagai Satani isa eafii'i papagai keagu, ke isa anina eani auga mo kekapaisa kai, Deo ega iifa akelogo felo aisama opo'i age'opai. Ke Satani ega pifoge nio koa fepakopa'i auga akelogo felo puo ake'ege.

Kapa'ina Mo Kina Fua'iai Akemia Auga Fou'i

3 ¹Timoti oi i'ina iifa'i fologo felo: Kina fua'iai papiau kapa apala'i ipauma'i ma'o akekapa'i puo, kina apala'i ipauma'i akemia. ²Ega'ina kina'iai papiau alo'i ko'agai ifo'i mo an'i'i akeani. Isa alo'i ko'agai moni mo anina akeani, ke kapa'ina akekapa'i au'i aina'au'i akepa'au'i. Isa akeopolaga papiau isa'i isa fou i'opo laa'i kai, isa ifo'i mo auga kelogo alogai akeoma. Isa Deo ke papiau fou ee'iai akeifa apala aage mo. Isa ina'i ama'i aina'i afakeafia. Ke Deo papiau fou tenkiu afakepeni'i. Ke mino'iai kapa apala'i mo akeopolani'i puo, alo'i ageofu alogaina. ³Isa alo'i ko'agai kai aga'o anina afakeani, ke gua'i afakeania e'i apala afake'agegeaina. Ke papiau pifogei akepaagu fofou'i. Isa ifo'i kegapaapakipo'i akeoma afaekaini'i. Ke isa a'o a'i'i koa i'opo'i, papiau ee'iai ake'e'efa alogaina, ke kapa felo'i au'i an'i'i afakeani. ⁴Isa papiau akeafi'i ake'afa'afalaini'i, ke kapa'ina akekapa auga, laafuai akekapa. Isa papiau ago'iai ifo'i au

akaiki'a'i akepamia'i. Ke Deo anina afakeani kai kapa'ina alo'i kepagama au'i mo kapa'i anii'i akeani akekapa'i. ⁵ Isa Deo keau afagaina akeoma kai Deo agepalagaini'i, e'i laomai felo agemia auga afakepako'ania. Kai pau ganinagai iina koa kekapal'i papiau'i isafa epomiai keague. Ega puo oi ega'ina papiau'i anii'i foloani, ke fomuni'i foumakalaini'i.

⁶Ega'ina papiau'i epo'i isal'i au'i ima'ima koa i'opo'i aifafa'i mo papiau e'i e'ai kekoko. Ke papie alo'i apokega, laomai apala'i alo'iai epogu, ke kapa apala'i ma'oai kemaani'i kainai, pifogeai alo'i keania, isa mo aina'i keafia. ⁷Ega'ina papie'i auga aufa kina kemalele aefuafua mo ganinagai, Deo ega iifa oko ko'a ipauma auga akelogo felo paisa. ⁸Pifoge pamalele'i ega'ina au'i ufainagai au auni'i aka'i, Ianes ke Iambres fou Moses keumakalaina koa i'opoga, pau isa Deo ega iifa kekaisapua. Isa tiapolo alo'i ke opo'i fou epalifu afe'aina. Ke isa Deo ega iifa akepako'ania kainai, Deo isa eumakalaini'i epua'afuni'i. ⁹Kai papiau Ianes ke Iambres auni'i kafo'o lao'i mai'i kekapal'i au'i fiakoa mo keisa'i kelogo. Ega koa i'opoga mo, pifoge pamalelega au'i kafo'o lao'i mai'i kekapal'i au'i afa'agamo agelao koa kai, papiau ma'oai isa e'i laomai ega'ina akeisa felo akelogo.

Kapa'ina Lomaleleaina Auga Fopako'ania Faefuafua

¹⁰Kai Timoti, oi lau e'u laomai ma'oai ala lakapa oma'i au'i lologo afe'ai: Lau kapa'ina mo lapamalele au'i ma'oai lologo. Ke kapa puo i'ina agofa'agai laagu, ke kapa'ina mo lakapai'i ke ala laagu oma auga isafa lologo. Ke Deo ala lapako'a oma auga ke pinauga laafi'inia mo elao auga lologo. Ke papiau anii'i ala laani oma ke kina apala eafiau lakiekie mo ganinagai, e'u kiekie gamuga mo laoponia laafiapia mo auga isafa fouga lologo. ¹¹Ke Antiok, Ikonium, ke Listra taoni'i'i kapa'ina mo faagauai kemia, ke papiau keafi apalaniau mo ganinagai, gamu'i mo laoponia laafiapia mo auga isafa fouga lologo. Ega'ina kapa'l'i ma'oai faagauai kemia mo ganinagai, aufa kina Lopia epalagainiau ee'iai epapealaisau. ¹²Iifa gome maamuai laifania. Papiau ma'oai anina keani Iesu Kristo kegapako'ania ke alo'i ko'agai Deo kegaau afagaina keoma au'i, papiau isa ega koa fekekapa auga anina afakeani puo akeafi apalani'i. ¹³Ega'ina alogai papiau apala'i kepifoge au'i papiau isal'i akefoge'i, ke e'i pifogeai papiau akefoge'i akepalifu alogaini'i akelao apala'i ipauma'i akemia. Ke tiapolo apala ipauma auga isa agefoge'i puo, ifo'i mo e'i iifa akepako'ania akekapa, ke ifo'i mo isafa akefoge'i. ¹⁴⁻¹⁵Kai Timoti, oi kaisau mo kepamalelenio auga lologo felo'i. Ke oi e'elemuai Deo ega iifa pukagai ega iifa kecae au'i lokuapini'i lologo felo. Ega'ina iifa'i oi Iesu Kristo alopako'ania aisama, kaniamu isagamauga ikifaga agepalogonio keagagai agepapeaiso. Ega puo oi Deo ega iifa ega'ina ko'a ipauma lomaleleaina, ke lopako'ania auga kai'i'i mo foapea faefuafua. ¹⁶⁻¹⁷Deo ega iifa puka ma'oai papiau kepapua'i aisama, Deo ega Spiritu isa epenii'i, ke Spiritu ega'ina

isa epalagaini'i e'imai'i puka ega'ina kepapua'i. Ke Deo anina eani papiau kapa'i Isa ega papiau epamia'i au'i, ega iifa puka akepapinauga aisama, isa e'i laomai felo'i, Deo epaini'i fekekapa eoma auga mo akekapa. Ke Deo ega iifa pukagai ega'ina pamalele'i papiau fau'iai agepinauga felo. Ke papiau puka ega'ina akekuapina aisama, laomai apala'i akekapa'i aisama agefina'i, ke agepalagaini'i ifo'i e'i laomai apala'i akeumakalaini'i. Ke ega'ina puka i'a isafa epamaleleni'a, epafuai'a aagu, ega koa Deo maagai laomai felo'i mo akapa'i.

Founiaimoimo Deo Ega Pinauga Fokapa

4 ¹Deo ke Iesu Kristo muni agemai pugu, mauni au'i ke mae au'i fou e'i laomai felo o apala auga afa agepeni'i. I'a isa ega mai pugu a'ima, ke ega agofa'a apako'ania faafia aoma. Ega puo Deo ke Iesu Kristo ago'iai laifa kapula penio: ²Oi Deo ega iifa foinogonia. Ke ega'ina alogai, papiau aina'i fekepaaua o fakepaaua mo ganinagai, fofua foagu Deo ega iifa foifafoua faefuafua. Ke papiau laomai apala'i kekapa aisama, ma'oai mo gamu'i mo foopo foafiapi'i mo, ke pamalele felogai magogo kapula fopeni'i ke fofina'i e'i laomai apala'i fekeumakalaini'i, ke keaga felogai fopapea'i. ³Kina aga'o agemai. Ega'ina kinagai papiau pamalele ko'a'i ipauma'i au'i fiakoa mo a'o'i ilogo akeumaka. Kai isa kapa'ina anil'i keani kemaani'i kegakapa'i keoma au'i mo kai'iai akepea. Ke aina'i eagaga kapa'ina a'o galogo eoma auga mo anina akeani. Ega kainai isa pifoge pamalele'i au'i ma'o akela'afouaini'i, ke kapa'ina anina keani auga mo akeifani'i a'o'i akelogo. ⁴Isa ega koa akekapa Deo ega iifa ko'a'i au'i a'o'i akelogo aisama, akeai me'e kai, pifoge isonioni'i mo a'o'i akelogoni'i. ⁵Kai oi kapa'ina mo faagamuai akemia mo ganinagai, alomu fopakapulania ke fo'ima feloiso. Ke kapa'ina eemuai ake'inoka ganinagai, gamu'i mo foopo foafiapi'i mo. Ke iifa faunina Iesu fougha iifafouga auga emu pinauga fopamia. Ega alokapa oma koa aisama, Lopia Iesu Kristo ega pinauga oi apumu lopamia auga alopfua afe'aina agekaina.

⁶Kai lau e'u pinauga auga lapafua efua. Iifa gome lau auga a'o keaupugu'i Deo kepa'a penia koa lamia puo, akeauzuguisau alamae. Kai lau gaika alamae auga alalogi kai, lau lalogo auga, e'u mae kina emai efua. ⁷Lau lakapula, launiaimoimo, Deo ega pinauga lakapaisa, papiau maa'iai iifa faunina Iesu Fouga faifafoua pinauga auga lapafua. Ega koa lakapaisa, pipalau auga epiau kapula piau epafua koa i'opoga, lau isafa lapinauga kapula e'u pinauga lapafua. Ke Deo ega iifa i'a apako'ania auga lau alou ko'agai kainai lapea. ⁸Ke lau e'u pinauga lakapa felo auga afa felo Deo lau apu eoma auga agepeniau. Ke Lopia Iesu Kristo papiau e'i laomai afa epeni felo'i auga agemai papiau e'i laomai felo o apala afa agepeni'i aisama, isa lau e'u pinauga afa, ega'ina kinagai agepeniau. Ega'ina kinagai isa lau mo afa felo afaepeniau kai, papiau kapa'i alo'i ko'agai isa ega mai pugu ke'ima au'i isafa afa felo agepeni'i.

Paulo Nini'ani Fuagai Timoti Epaini Kapulania

⁹Oi fokapula fofia koa keaga aga'o foisa eeu fomai. ¹⁰Gome lau fou apea auga aga'o aka Demas alo ko'agai agofa'a amu'i mo anil'i eani kainai, epua'afuniau Tesalonika taonina elao. Ke au aka Kresens auga epua'afuniau Kalatia ago elao, ke Taitus isafa epua'afuniau Dalmatia ago elao efua. Papiau ma'oai lau kepala gainiau au'i kepua'afu afe'ainiau. ¹¹Kai Luka mo lau fou inae aague. Oi alomai aisama Mako isafa foafia fou fomai, gome isa lau e'u pinauga ikapagai agepalagai feloisau. ¹²Lau Tikikus fou inae apinauga auga laulaisa Efesus taonina elao. ¹³Ke oi agomai aisama au aka Karpus, Troas taoninai eagu auga ega e'a'i lau e'u ama tiapuga ekae foafia fomaiseina. Ke e'u puka afe'i a'o faaga'lai kekapai'i au'i isafa foafi'i fomaiseini'i.

¹⁴Au aga'o aka Aleksanda kopa eafia amu ekapa'i auga kapa apala'i ipauma'i lau eeuai ekapai'i. Kai Lopia Iesu Kristo isa kapa'ina ekapai'i auga afa agepenimue. ¹⁵Ke oi ifomu fo'ima felioso, au ega'ina eemuai kapa apala aga'o faekapa, gome isa alo ko'agai i'a Deo ega iifa ko'a'i apamaleleni'i auga anil'i aeani puo ekaisapu'i.

¹⁶Lau la'ina mo iifa lapakaisa aisama, papiau ma'oai kepua'afuniau, ke kai aga'o aepalagainiau iiu aeogeisa. Kai isa ega koa kekapaisa mo ganinagai, lau anina laani Deo isa e'i apala fe'agegeaina laoma. ¹⁷Kai ega kina'iai lau iifa ipakainai laapa alogai Lopia epapinauganai Iudea papiau'i laa'i au'i maa'iai iifa faunina isa ifo fougha faifafou a'o fekelogo eoma. Ega puo Lopia lau fou amia epalagainiau epakapulaniau. Ke lau iifa ipakaina afugai lakoko aisama, papiau laion koa i'opo'i fekeagaisau famae koa i'opoga kai Lopia epalagainiau kaniau eagamauga. ¹⁸Ega koa i'opoga, papiau laomai apala'i ipauma'i ma'oai kekapa'i au'i, lau akeafi apalaniau mo ganinagai, Lopia lau isa ee'iai kaniau ageagamauga. Ke fuagai age'ima feloisau, agelaoainiau ufai ega agofa'ai agepaaguisau. Ega kainai i'a a'a Lopia faau afagaina, ke au akaiki'a fapamia aoniamo. Amen.

Pamego Nini'ani'i Fua Au'i

¹⁹Lau e'u pamego nini'ani'i papie aka Prisila akafa Akuila aunil'i, ke Onesiforus ega famili fofougai fou fopeni'i laoma. ²⁰Ke Erastus auga Korinto taoninai eague. Kai Tropimus auga eisafa puo Miletus taoninai lapua'afuga eague. ²¹Oi fokapula fopaaifi imu ega au kina aemai koa kai keaga aga'o foisa eeu fomai. Lau inae fou aague au'i Eubulus, Pudens, Linus, Klaudia, ke pakoa papiau'i ma'oai fou e'i pamego nini'ani'i eemuai keulaisa.

²²Lau alou ko'agai Lopia Iesu lamegamega penia, ega koa isa oi eemuai feagu laoma. Ke ega gafegafe akaiki'a, oi, ke fou egae oague aumi ma'oai fepenimi laoma.